

Inissianik attartortitsisarneq pillugu Inatsisartut peqqussutaata nr. 2, 12. maj 2005-imeersup UPA 2017-mi allangortinneqarnissaa pillugu Naalakkersuisut suliniuteqaqqullugit inatsisartut aalajangiiffisassaattut siunnersuut. Taamaaliornikkut atorfirmut atatillugu inigisap sivikinnerpaamik ukiuni tallimani attartoreerneratigut attartortup nalinginnaasumik attartukkatut inigilersinnaaqqullugu.

(Inatsisartunut ilaasortaq Anthon Frederiksen, Partii Naleraq)

Siunnersuutip aappassaaneerneqarneranut

Sanaartornermut ataatsimiititaliap

ISUMALIUTISSIISSUTAA

Suliarineqarnerani Ataatsimiititaliaq ukuninnga inuttaqarpoq:

Inatsisartunut ilaasortaq Anders Olsen, Siumut, Siulittaasoq
Inatsisartunut ilaasortaq Kalistat Lund, Inuit Ataqtigiit, Siulittaasup tullia
Inatsisartunut ilaasortaq Jens-Erik Kirkegaard, Siumut
Inatsisartunut ilaasortaq Ane Hansen, Inuit Ataqtigiit
Inatsisartunut ilaasortaq Justus Hansen, Demokraatit

UPA 2016-ip nalaani ull. 4. maj 2016 siullermeerereermermi Ataatsimiititaliap siunnersuut misissorpaa. Immikkoortoq UKA 2016-imi suliarineqartussanngorlugu kinguartinneqarmat siunnersuutip misissoqqinneranut aasaanera ataatsimiititaliamit atorluarneqarpoq.

Siunnersuutip imaa siunertaalu

Siunnersuuteqartup siunertaraa, nunami innuttaasut akornanni immikkullu innuttaasut sulisut akornanni nuttarneq pillugu siuarsaanissaq. Nuttarnerup pitsaanermik pilernissaani tunngaviliunneqarpoq, innuttaasut sulinerminnut atasumik iniminnut pituttugaannginnissaat, inigisalli taassuma initut nalinginnaasumik attartortakkatut atuutilernissaa.

Siunnersuutip Inatsisartuni siullermeerneqarnera

Partiit akornanni nalinginnaasumik isumaqatiginartinneqarpoq, innuttaasut ininik pitsaanernik akikinnernillu periarfissaqarnissaasa isumannaarunnissaat, inigisarmi pigiinnarsinnaajumallugu suleqataasut kikkulluunniit suliffimmi kajungerinngisaminni ingerlaannarnissartik soqutigisarigunannigilaat.

Naalakkersuisut siunnersuutigaat, siunnersuut Inissianik attartortitsisarneq pillugu peqqussutip ataatsimut aaqqissuuteqqinniarnernut ilanngunniarneqassasoq, taamaalilluni immikkoortoq una tunngavigalugu immikkut allannguutissatut siunnersuummik qinnuteqartoqartariaqassanngimmat.

Saaffiginnissutit

Ull. 18. april Ataatsimiititaliap A/S Inissiaatileqatigiiffik INI ataatsimeeqatigaa. Ataatsimiinnermi Ataatsimiititaliap piumasaqarneratigut pisumi A/S Inissiaatileqatigiiffik INI siunnersuummut saqqummiunneqartumut isummaminik ilisimatitsivoq.

Ataatsimiititaliap siunnersuummik suliaqarnera

Inissianik attartortitsisarneq pillugu Inatsisartut peqqussutaanni nr. 2, 12. maj 2005-imeersumi isumaliutissiissut Ataatsimiititaliap misissuinerminut atatillugu nassaarisimava. Tassani ima allassimasoqarpoq:

”Allannguutit ilaat Inatsisartut Attaveqarnermut Ineqarnermullu Ataatsimiititaliaannit maluginiarneqartoq tassaavoq sulisunut inissiat ukiut arfineq marluk najugarineqareernerisigut inissiatut nalinginnaasumik attartukkatut tiguneqarsinnaalernissaat. Tamatuma saniatigut soraarninngortut sulisunut inissiami ukiut pingasut najugaqarsimagunik soraarninngornerminni taassuma tiginissaanut periarfissinneqarnerat pissusissamisoortutut ataatsimiititaliamit isigineqarpoq. Iliuutsit taaneqartut ineqarneq suliffeqarnerlu eqqarsaatigalugit nikerarsinnaassuseqarnermut annertusaataaqataallutillu suliffeqareernerup kingorna soraarninngortut amerlanerit nunatsinniiginnarnissaannut periarfissiipput.”

Oqallinnermi tunngavilersuutitut saqqummiunneqartut tunngavigalugit aamma pineqartoq pillugu ataatsimut isigalugu naliliineq tunngavigalugu Ataatsimiititaliap nalilerpaa, sulisunut inissiani ineqartut tamarmik naligiissinneqarnissaat tulluartaussasoq, taamaalilluni sulisunut soraarnerussutisiaqalernissaminnut atatillugu immikkut pisinnaatitaaffeqartoqassanngilaq, tamannami maanna Inissianik attartortitsisarneq pillugu Inatsisartut peqqussutaanni § 21, imm. 3-mi atuummat.

Ataatsimiititaliarli naliliivoq ukiunit tallimanit allaanerusumik allannguisoqassappat tamanna naapertuutissanngitsoq, tamannalu siunnersuummut naapertuuppoq.

Siunnersuutip aningaasatigut kingunissai

Siunnersuutip tunngavilersuutitaani aalajangiiffigisassatut siunnersuutip piviusunngornerani aningaasatigut allaffissornikkullu kingunissai allaaserineqassasut Inatsisartut Suleriaasianni § 33, imm. 1-mi allassimavoq.


Ataatsimiititaliap paasivaa, tamanna tunngavigalugu siunnersuutip piviusunngornerani aningaasatigut kingunissai taaneqarsimasut, taamaalillutik allaffissornikkut aningaasatigullu

siunnersuutip kingunissai tassaalissallutik AC tunngavigalugu sulisitap akissarsiaasa 1/12-ii, taakkulu maanna aningaasatigut killiliussaareersunit tiguneqarsinnaassasut.


Ataatsimiititaliap inassutai

Ataatsimiititaliap isumaqatigiittup inassutigaa siunnersuut akuerineqassasoq:


Taamatut oqaaseqarluni isumaliutissiisummilu allassimasutut paasinnilluni Ataatsimiititaliap siunnersuut aappasaaniigassanngortippaa.


Fos


Kalistat Lund,
Siulittaasup tullia


Anders Olsen, Siulittaasoq


Jens-Erik Kirkegaard


Justus Hansen


Ane Hansen